

LES TRWES PASQUEYES D'ONE VIKERIYE.

Lès-anéyes ont passé, lès blancs tch'vias arivenut
Quand i n' l'ont nin trossî, divant d' candjî d' coleûr ;
Tot ç' qui n's-avans conu mins qu'on n' s'è sovint pus,
Dès momints plins d' coradje, dès-eûres faîtes di bouneûr.
Quand l'èfant a skèpyî, qu'il è-st-en boune santé,
Maugré qu'il èst si flauw, c'èst li rwè dèl famille ;
Tot l' monde è-st-autoû d' li, p'tit Bon Diè adôré ;
Li, i n' veut qui s' moman, èlle èst l' prumêre dèl file.
Li timps, lès protècsions, vo-l-la on rwèd gamin.
I n'a dandjî d' pèrson.ne, i vout mwinrner s' bârquète !
I toûne li dos à s' man : l' pus bèle bauchèle do cwin,
I vout mète si mwin d'ssus, i 'nn'èst bleuw, dèl djon.nète.
Mins il a bau tchanter qu'i l' veut voltîy au d'là,
Por lèye, c'è-st-on bon fieû. Di d'là à yèsse mâriéye ?
Ça d'mande à reflèchi ! Èle sèt bin qu' tot ç' qu'èst bia
N'èspêche jamaîs pèrson.ne di tchaîr à coût d' mon.néye.
Li, i n'î comprend rin ; pusqui sès sintimints,
Èle n'î a nin crwèyu, i va fé on maleûr !
Do côp, i va ratinde qu'èle lî stindenuche leûs mwins
Po profiter dès feumes, mins l' mète à yute, si keûr.
Ç'a stî l' prumêre pasquéye, i n' l'a jamaîs rovî,
D'one vikériye qu'aveut dès-istwêres plin sès potches ;
À mitan disflanîyes, lès coméres qu'ont pêyî,
Chaque côp qu'i l's-a daubé, c'èst co li qu'a yeû l' flotche.
Quarante ans ont passé, i s' ritrove disbèli ,
Lès coméres l'ont chorté. Mins on' ome, èst ç' li minme ?
Il a saquants soçons qui n'ont jamaîs minti.
Tos lès cias qu'i coneut, à s'-t-idéye, c'èst dès crinmes.
Si t'èspliques à on' ome qui t' soufris ou qu' t'as fwim,
I n' ratchawetéyerè nin si on lî d'mande di s' taîre !
D'acôrd, lès vraîs soçons, i s' comptenut su one mwin,
Mins avou lès coméres, lès cancans, c'è-st-à braîre.

I lî chone qui, lès-omes, on s'î pôreut fiyî
 Pusqui, dispû todi, on-z-èst fait dèl minme pause.
 Il a yeû rade compris qu' zèls èto, s' fyin.n' priyî
 Po d'ner on côp di spale, jamaîs po fé l' dicauce.
 Èt c'èst l' deûzyinme pasquée qu'a v'nu acèrtiner
 Qu'one comére èt on' ome, su ç' plan là, si r'chonin.n' ;
 L'amoûr èt l'amichté, on lès pout acopler :
 Si t' choufèlereûves après, nin sûr qu'i rèspondrin.n'.
 Lès preûves ? C'èst qu'onk èt l'ôte, quand i sont bin toûrnés
 Mostèrront qu'i sont là, sins pont fé d' misaumènes ;
 Mins saquants djoûs après, vo-lès-la tracassés !
 C'èst qu'i n' saurin.n' yèsse libes... ! Gn-a pus qu'à dîre : « Âmèn' ! »
 I n'èst nin disgosté, i n' si discoradje nin ;
 On lî a todi dît : “ Tant qu' gn-a vîye, gn-a èspwêr “.
 I s' vout co fé plaîji, mins sins dépende dè djins :
 Il aurè l' dêrin mot, èt i s'è frè one glwêre.
 I s' ritoûne su lès lîves qu'il a tofêr bèni.
 On lîve, ça n' dimande rin, qu'èst ç' qu'i-gn-a d' pus fiyauve ?
 Il arive qu'one comére a l' dâr di v' ragaîyi,
 Mins on quârt d'eûre après, vo-l'-la div'neuwe èyauve.
 On lîve èst todi là, c'èst li qui vos ratind ;
 Vos n' l'ètindroz jamaîs vos dîre : « Poqwè ç' qui t' grogues ? »
 Portant, à môde di rin, i v' ramwin.ne su lès djins :
 C'èst li, l' trwèzyinme pasquée, mins li, eûchîz-è sogne !

Albert Delvaux

Tchaîr à coût d' mon.néye : se trouver dans le besoin
 Dauber : rouler
 Awè l' flotche : sortir vainqueur